

22. oktobari 2007

UKA 2007/33

UKA 2007/34

**Aningaasarsianit akileraarutit pillugit Inatsisartut inatsisaata
Allanngortinneqarneranik Inatsisartut inatsisissaattut siunnersuut.**

(Aappariit ataatsimut akileraartussaataa nerannik atorunnaarsitsineq, aammalu selskabit piginneqatigiissut iluminni nuutsinerinut akeqartitsinermut, aamma selskabit imminnut pigisut aningasanik attartortarnerinut CFC-mik akileraarusiineq pillugit malittarisassanik atuutilersitsineq)
(UKA 2007/33)

aamma

**Akileraaruserinermik ingerlatsineq pillugu Inatsisartut inatsisaata
allanngortinneqarnissaanik siunnersuut.**

(Aappariinnik ataatsimut akileraarusersuinerup atorunnaarnera naqeriikkamillu namminneerlunilu nalunaarusiorneq)
(UKA 2007/34)

pillugu

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

Siunnersuutip aappassaaneerreqarnerani saqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat suliarinninnermini u-kuninnga inuttaqarpoq:

Inatsisartunut ilaasortaq Kristian Jeremiassen, Atassut (siulittaasoq)
Inatsisartunut ilaasortaq Juliane Henningsen, Inuit Ataqatigiit
Inatsisartunut ilaasortaq Lene Knüppel, Demokraatit
Inatsisartunut ilaasortaq Ole Thorleifsen, Siumut (sinneissusaq)
Inatsisartunut ilaasortaq Ruth Heilmann, Siumut (sinneissusaq)

Inatsisartut Akileraartarnermut Akitsuusiisarnermullu Ataatsimiititaliaata UPA 2007-imi siunnersuutiniq siullermeerineq tunngavigalugu siunnersuutit inatsisissatullu siunnersuutitut nassuiaatit, tusarniaanermillu atortussat pissarsiarineqartut misissuataarpai.

Tusarniaaneq.

Siunnersuutit piffissami apriliip 30-annit 2007 juunip sisamaanut 2007 ataatsimut tusarniaassutitut nassiunneqarput, akissutillu allanneqarnerinut oqaatsit atorlugit tusarniaanermut akissutit nuutinneri Akileraartarnermut Akitsuusiisarnermullu Ataatsimiititaliamit tiguneqarlutik. Tusarniaanermut akissutit inatsisissatut siunnersuutitut nassuiaatit nalinginnaasut atorlugit Naalakkersuisunit oqaaseqarfigineqarput.

Siunnersuutit Inatsisartunit siullermeerneqarnerat.

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaattut siunnersuut (UKA 2007/33) Inatsisartunit siullermeerneqarmat partiit Siumut Atassullu apeqquusiinatik tapersiippat, partiillu sinneri assigiinngitsunik apeqquteqarlutik nalorninerminnik nalunaaruteqarlutik.

Akileraaruserinermik ingerlatsineq pillugu allanngortinneqarnissaanik siunnersuut (2007/34) Inatsisartunit siullermeerneqarmat partiit Siumut Demokraatillu apeqquusiinatik tapersiippat, Kattusseqatigiilli Partiiat itigartinneqaqqullugu inassuteqarluni. Partii Atassut arlalinnik apeqquteqarpoq nalorninermilluunniit nalunaaruteqarluni.

Aningaasaqarnermut Nunanullu Allanut Naalakkersuisoq oktobarip 12-iat 2007 allagaqarluni siunnersuutit siullermeerneqarnerani apeqqutitut saqqummiunneqartunut itisiliilluni akissummik nassitsivoq. Naalakkersuisunut ilaasortap allagaa isumaliutissiisummut matumunnga **ilanngussaq 1-tut** ilanngunneqarpoq.

Kukkunersuiisoqarfik Deloitte tusarniaanermut akissumminik ulloq juunip sisamaat 2007-meersumik oqaatigalugit saqqummiussamik itisiliissasut Akileraartarnermut Akitsuusiisarnermullu Ataatsimiititaliamit qinnuigineqarput. Ulloq oktobarip 20-at 2007 tusarniaalluni ataatsimiinnermi ataatsimiititaliap kissaataa naammassineqarpoq. Deloittemit tusarniaanermut akissutaasimasoq kiisalu tusarniaalluni ataatsimiinnermit allakkiaq isumaliutissiisummut matumunnga **ilanngussaq 5-tut 6-tullu** ilanngunneqarput.

Akileraartarnermut Akitsuusiisarnermullu Ataatsimiititaliamit isumaliutigineqartut.

Aappariit ataatsimut akileraartussaataitanerannik atorunnaarsitsineq pillugu Akileraartarnermut akitsuusiisarnermullu Ataatsimiititaliaq oqaaseqarpoq, Naligiissitaanermut Siunnersuisoqatigiinnit saaffiginnissut tunngavigalugu ataatsimiititaliap 2006-mi kissaat saqqummiussaa Naalakkersuisut malikkaat. Naligiissitaanermut Siunnersuisoqatigiinnit saaffiginnissut, Akileraartarnermut Akitsuusiisarnermullu Ataatsimiititaliamit tamatuma malitsigisaanik Naalakkersuisunut apeqqutit kiisalu Aningaasaqarnermut Nunanullu Allanut

Naalakkersuisumit akissutitut allagaq isumaliutissiisummut matumunnga
ilanngussaq 2-tut, 3-tut 4-tullu nassiunneqarput.

Aappariit ataatsimut akileraartussaataitanerannik atorunnaarsitsineq allat tamaasa
allanngortinnagit innuttanut pisortanullu annikitsumik aqutsinikkut
pisarissersuutaalaassasoq ilumoorpoq. Arnalli amerlasuut paasineqarluarsinnaasumik
aningaasaqarnikkut inersimasuunngitsutut aappaminnut maliguutiinnartussatut
inatsiseqarnikkut ajoqusigaasimasutut misigisimasarmata ataatsimiititaliap
ilisimaaraa. Ullumikkut arnat ilaqutariinnik pilersuineri annertuumik
isumaginneqataanerat qaqutigootuunngimmat qanga arnanik isiginneriaatsimut
inatsiseqarneq ersiutaasoq naleqqukkunnaarsimavoq.

Isertitat pigisallu akisuut aalajangersimasut akileraartarnikkut inatsisitigut
immikkoortiterneqarnissaat inatsisip allannguutaata pisariaqalersissammagu
aammattaaq ilumoorpoq, taakkulu siunissami nuliaasumut taamatullu uiusumut
naatsorsuunneqassallutik. Taamatut immikkoortiterineq ataasiaannartumik
pisussaasoq aappariit akornanni pisut ilaanni isumaqatigiinnginnermik
pilersitsisinnaammat ilumuunnginnerarneqarsinnaanngilaq, tamannalumi aamma
Inatsisartut suliarinninneranni tikkuarneqarluni. Peqqutaagajuttoq tassaassaaq uiusup
nassuerutigiumassanngimmagu arnap pigisani isertitallu nammineerluni
oqartussaaffigai. Aappariit akornanni inatsimmut allannguut taamaattoq
eqqisseqatigiinnginnermut patsisaassappat ajuusaarnartorujussuussagaluartoq,
tunngavilersuutip tamatuma erseqqissaannarpaa inatsimmut allannguutigititassatut
siunnersuutigineqartoq pingaartuusoq. Taamaalilluni aningaasarsianit akileraartarneq
pillugu inatsit inuiaqatigiinni arnatatta inatsisitigut aningaasaqarnikkulluunniit
aappaminnik isumalluuteqartutut isigineqartuarnissaannik
paatsuuisitsisuujaannartariaqanngilaq.

Ataatsimut akileraarusigaanerup atorunnaarsinneqarneratigut aningaasaqarnikkut
pitsaanngitsumik kinguneqaatinik innuttat misigisaqarnissamut
aarleqquteqarsinnaanerat pillugu Aningaasaqarnermut Nunanullu Allanut
Naalakkersuisoq tamatuma pinnginnissaa qulakkeerumallugu allannguutissatut
siunnersuuteqarnissaq allakkamini ilimasaarutigaa.

Tamanna tunngavigalugu aappariit ataatsimut akileraaruserneqartarnerisa
atorunnaarsinneqarnissaanik siunnersuut Akileraartarnermut Akitsuusiisarnermullu
Ataatsimiititaliap ilassilluarpaa, neriutugalugulu ilaqutariinni, taamatullu
inuiaqatigiit ataatsimut isigalugit, tamanna naligiissitaaneq pillugu pitsaasumik
oqaloqatigiinermut sunniuteqaqataassasoq. Ataatsimiititaliamittaaq
iluarisimaarneqarpoq aningaasarsianik nammineerluni nalunaaruteqarnermi
naqeriikkanik atuutilersitsinissamut inatsisissatut siunnersuut periarfissiissammat,
taamatullu pisariillisaaneq aningaasarsianik nammineerluni nalunaaruteqarnerit
amerlinerinik taarteqarumaarmat.

*Nuussinermut akeqartitsineq, CFC-mik akileraarusiisarneq annikitsumillu
aningaasannguisarnermut maleruagassat pillugit Akileraartarnermut
Akitsuusiisarnermullu Ataatsimiititaliap iluarisimaarlugu maluginiarpaa nunani*

tamalaani inatsiseqarnermut tunngasumi tamatumani pisariusumut Kalaallit Nunaat malinnaasinnaalissammat.

Nunarsuarmi ukiuni kingullerni ineriartornerup nassatarisimavaa nunat akornanni killeqarfiit apeqqutaatinnagit suliffeqarfiit sukkasuumik aningaasanik nuussisinnaalernerat. Nunarsuarmi erniat appassisumik inissisimanerisa kingunerisimavaa iluanaarniutitut pissusilimmik inuussutissarsiornikkut ingerlaturanut sukkasuumik aningaasarpapiluunersuarnik aningaasaliisoqarsinnaalersimammat, amerlasuutigut nunani ataasiakkaani akileraartarnikkut inatsiseqarnerup assigiinngissuteqarnerata anguniagaqarfiulluinnartumik atorneqarneratigut. Taamatut ineriartortoqarnera nunarsuarmi naalagaaffiit aningaasaqarniarnerat pisortallu aningaasaataat taamatut kissaatiginangitsumik kingunerisat annertusiartortumik oqimaatsorsiortippaat, taamaaliartuaarnerlu nunani tamalaani inatsiseqarnikkut ataqatigiissaakkamik iliuuseqarnikkut taamaallaat pinngitsoorneqarsinnaavoq.

Maleruagassat nutaat akuersissutiginerisigut Kalaallit Nunaat taamatut suleqatigiinnermi naligiissitatut inissisimalissaaq.

Nunani assigiinngitsuni akileraarutitut tunngatillugu inatsiseqarnerit nunanit tamalaanit aningaasaliissarsiorsiornikkut unammilleqatigiittoqarmat tamatumunnga ilanngullugu nassuerutigisariaqarpoq. Nunani tamalaani ingerlatseqatigiiffinnit aalajangiisuusumik sunniutilinnut nunatsinni akileraarusiisarnermut maleruagassat sakkortuutut isumaqarfigineqarpata nunatta aningaasaliivissaqqissutut nittarsanneqarnissaanik namminersornerullutik oqartussat kissaataat illua tungilerneqassaaq. Aatsitassanik iluaquteqarniarnerit tunisassiernerillu nukissiuutinik annertuumik atuiffiusut annertuunik pilersaarusiugassat aningaasaliivigineqartariaqartullu pilersinneqarnissaat tamatuma ilaatigut aporfisseratarsinnaavaa.

Annikitsumik aningaasannguisarnermut maleruagassat (UKA 2007/33) nunanut allanut sanilliussigaanni sakkortuginarsinnaasut tassunga atatillugu ataatsimiititaliaq paasisaqarpoq, namminerisamik aningaasaatinut tunngatillugu taarsigassarsisitsinermut annertussuseq 2:1-mut angissusia qaangerneqarpat akileraarutitigut kinguneqaatit killup tunganut sunniutissammata. Nunani allani taarsigassarsinissamut annertussutsitut akuerisaasoq sallaannerulluni assersuutigalugu annertussuseq 3:1-uvoq, 4:1-ulluniluunniit, taamaalillunilu suliffeqarfiit aningaasaqarnikkut naammineernerullutik iliuuseqarsinnaanerat annertunerulluni.

Tunngavittut saqqummiussaq tunngavigalugu Naalakkersuisut taarsigassarsisitsinermi annertussusissatut siunnersuutigisaat 2:1 Akileraartarnermut Akitsuusiisarnermullu Ataatsimiititaliamit isumaqatigalugu toqqarneqarpoq, Naalakkersuisulli **kaammattorlugit** nunani allani tamatumunnga atuuttunik maleruagassanut maleruagassaq taanna sanilliullugu Naalakkersuisut sukumiisumik ingerlaavartumillu misissuiffigisassagaat, ilanngussamilu 6-mi taaneqartutut maleruagassanut allanut sanilliullugu maleruagassamut ajornartorsiutit annikillisinniarlugit anguniagaqarfiusumik aaqqissutissarsiniarlutik Naalakkersuisut suliaqassasut ataatsimiititaliap ilanngullugu **kaammattorpai**. Piffissaq naleqquttoq

atorlugu tassunga tunngasumik Naalakkersuisut erseqqinnerusumik
isumaliutersuutaat Akileraartarnermut Akitsuusiisarnermullu Ataatsimiititaliamit
tusarumaneqarput.

Akileraartarnermut Akitsuusiisarnermullu Ataatsimiititaliap inassuteqaataa.

Akileraartarnermut Akitsuusiisarnermullu Ataatsimiititaliaq isumaqatigiittoq siuliani
oqaaseqaatini tunngavigalugit inassuteqarpoq Naalakkersuisut allannguutitut
siunnersuuteqarnissamik ilimasaarutaanni takuneqarsinnaasutut allannguutinik
ilallugu siunnersuut aappasaanerinermini saqqummiunneqartoq Inatsisartut
akuersissutigissagaat.

Taama oqaaseqarluni Inatsisartut Akileraartarnermut Akitsuusiisarnermullu
Ataatsimiititaliaata siunnersuut aappasaaniigassanngortippaa.

Kristian Jeremiassen
Siulittaasoq

Ole Thorleifsen

Ruth Heilmann

Juliane Henningsen

Lene Knüppel